


古今法書日苑

四十一
四十二

412
49
22





49
22



古今法書苑卷之四十一

吳郡王世貞元美甫編

十一之墨蹟十

雲間王乾昌伯元甫校



太祖御府所藏行書一

御批祥瑞表

末帝御府所藏行書一

正明勅

周

世宗御府所藏行書一

賜張昭詔

五代

錢鏐御府所藏正書一

貢棗帖

李璟御府所藏正書一

邊鎬奏狀

薛貽矩御府所藏正書一

貽詈光草書序

盧汝弼御府所藏正書一

贈詈光詩

豆盧革御府所藏一十

正書

開講帖

鄭長官帖

行書

大德帖

寒食帖

頂辭帖

王仁裕御府所藏正書一

送禹偁詩

友公大德帖

王郎君帖

吾師帖

買花帖

田園帖

楊邠御府所藏正書一

清潭等帖

羅隱御府所藏行書四

外羅城記藁

喜慰帖

韋莊御府所藏行書二

借書帖

米團帖

張徐州御府所藏行書一

勸君詩

三十一郎帖
華陰樵寄帖

潘祐御府所藏行書一

許堅等詩

孫昭祚御府所藏行書五

四色牡丹賦

陽春曲等詩

朱陳村等詩

杜荀鶴御府所藏草書一

雲扁帖

薛存貴御府所藏草書五

應舉帖

南山賦

竹拄杖等詩

西征帖

秋熟帖

到城帖

到任帖

楊凝式御府所藏三

草書

古意帖

正書

韭花帖

行書

乞花帖

景度書天真爛漫縱逸類顏魯筆坐位帖秘閣校理

蘇澥家有三帖第一白麻紙曰景度上大僊第二第三小字與薛紹彭家所藏正書相似余三次易得後以第一易與王詵第二易與劉涇余家今收楮紙上詩云春來冰朱泮冬至雪初晴為報方袍容豐年瑞已成王以畫易於趙叔益紛披老筆王安石少嘗學之人不知也元豐六年余始知荆公於鍾山語及此公大賞歎曰無人知之其後與余書簡皆此等字張直清家楊凝式數帖真行甚好

米元章

神仙起居法

楊少師書山谷比之散僧入聖其微妙可知矣殆與

李太白識郭子儀同道至元戊子立春日左山商擬
題

米元章云楊凝式字景度書天真縱逸類顏魯公爭
坐位帖余家收楮紙上詩紛披老筆王荆公少嘗學
之人不知也野齋新得神仙起居法一帖喜以見示
野齋有美痰在兩膝能依此法用工久當獲奇驗也
至元戊子暮春既望信安劉夢炎題

右楊少師神仙起居法八行南宮書史東觀餘論宣
齋書譜皆不載余驗有紹興小璽及內殿秘書諸印
蓋思陵故物後有米文仁審定跋尾及御書譯文五

行按紹興內府書畫並令曹勛龍大淵等鑒定其上
等真蹟降付米友仁跋而曹龍諸人目力苦短往往
剪去前人題識此帖縫印十餘皆不全是曾經剪拆
者其源委受授莫可得而考也標綾上有曲腳封并
閱生葫蘆印是嘗入賈氏蓋似道柄國御府珍祕多
歸私家最後有商左山參政留中齋丞相跋留稱野
齋者元翰林學士承旨李謙受益號野齋居士博雅
好古虞文靖詩所謂五朝文物至於今者又有廣東
宣慰使郭昂彥高亦號野齋而其出差後李在世祖
時為應奉文字正與商留同時商又同郡人此帖必

李氏物也嘉靖庚子春長洲文徵明跋

題楊少師書後

周太子少師楊公凝式墨蹟多在洛陽城佛寺中今
存者廣愛長壽天官耳露與果凡六處皆題于壁洛陽
有此在延福坊又集賢校理郭仲微兩興教嘉善新告有十餘字耳露致之公在洛或與
人為銘記皆不自書公之書無刻于石者以公之筆
其馳騁自肆蓋得於已意不可盡其然哉予非善書
者莫能知記公所題壁距見踰八十年字頗缺落不
可辨識者十三四天王院僧繼明慮公之書久遂無
傳命僧擇字之最完者得長壽甘露兩壁摠八十七

摹刻于石寶元元年某月某日尹洙題

釋應之御府所藏行書二

曲直不相入賦

卽事等詩

宋

高宗

御書養生論卷

右嵇康養生論一卷真草相間用智永千文體後有
德壽御書印德壽宋高宗宮名作于紹興十八年戊
辰實中興之二十二年也又九年丙子孝宗受禪始
尊高宗為太上皇退處德壽又十四年年八十一而

崩於是宮此書蓋倦勤時筆計其年當過耳順而楮墨精密乃如此豈真有得于養生之說故歟史稱其博學彊記繼體守文而撥亂反正復讎雪恥爲未足觀于是書者其亦有所感矣吾友楊應寧都憲得此而藏之敬題其後

李東陽

理宗

御筆賜吳潛詩

宋理宗御筆七言律詩一首後有賜吳潛二字又有庚戌二字印蓋淳熙十年履齋公爲參政時所賜也明年公入相又明年遂罷開慶元年再相元年復罷

方其嚮用之時恩禮優渥至以文事相與以泊效相願不旋踵而踈斥廢棄若未始有者君子之難合而易退固如此故苟非道交義合乃徒以言辭體貌爲輕重其可恃也哉吾鄉先達學士劉先生題是卷慨君子小人之竝用蓋公紹定間爲郎官時上疏有云毋竝用君子小人以爲包荒毋兼容邪說正論以爲皇極其於理宗固窺之深矣今閱世累代跡其故實猶以爲朝廷之盛事不亦重可慨哉先生之題爲公裔孫學正原熙原熙之孫爲今行人宗周持卷視予紙墨圖印完好如故自其家視之其文與獻亦足徵

矣因贅子末簡而歸之李東陽

益端獻王御府所藏篆書一

二十六體篆

錢俶御府所藏草書二

國子真講神牒

手簡

李煜御府所藏二十四

行書

淮南子

春草賦

義天平尺記

浩歌行

克已處分

批元奏狀

禮三寶象聖賢儀

八師經

宮相詩

李璟草堂等詩

高秋等詩

牡丹等詩

古風詩二

論道帖

招賢詩帖

樂童羅帖

樂府三

臨江仙

雜文彙

正書

金書心經

智藏師真贊

徐鉉御府所藏篆書七

大道不器賦上下二

禪賦一

篆隸二

于文二

章友直御府所藏篆書一

三經堂歌

宋綬御府所藏正書八

草制

草劄

密表

杜甫謁廟詩

和園池詩筆

飛白書上下二

千文

蔡襄御府所藏正書二

南郊慶成詩

茶錄

還願詩

杜衍御府所藏草書一

天隱子絕句詩

周越御府所藏草書三

賀知章賦

詩句

千文

蘇舜欽御府所藏五

行書

吳中詩草

遊山詩

學館臥病等詩

夢歸等詩

草書

雉帶箭等詩

跋蘇滄浪草

蘇氏父子兄弟以文學鳴汴都盛時傳家筆劄擅聲翰府子美尤稱獨步贊者謂花發上林月澗淮水其既遭一網之打殘章碎簡留蹟極寡後朝廷重購於其家家裏數簡上之皆才翁筆也朝廷不知其家亦不知也此帖董良史氏所藏今在中丞陸君家允明

在南京中丞出示撫玩竟日平生眈見之耳意謂根本大令而得於張長史為多第前人未嘗論如此如其鋒穎秀削清勁動盪則花月二語亦頗得之祝允明

蘇滄浪詩

右此蘇滄浪草聖也初出人或擬為杜祁公余曰非也蓋祁公壻耳寶祐丙辰七夕書于閨中今古齋右少陵絕句漫興九首而滄浪書其八其不書者云隔戶楊柳弱嫋嫋恰似十五女兒腰誰謂朝來不作意狂風挽斷最長條豈以其辭涉浮艷邪史載題右輕薄桃花誤作楊花深造次誤作徒造次皆筆勢

迅駛不知其然而然者非誤也是未可與俗人言也
史又書

右公卿侍御得此卷示予予初閱之以爲山谷書不知其出於滄浪翁也蓋翁晚寓蘇州其手跡絕少雖予蘇人亦未嘗見其書也山谷與翁生同時豈嘗師之故其草法相類後特加工耳然翁之妙處未可輕論所謂惟觀其深者知之吳寬跋

右滄浪草書嘗見中山石刻與此頗不類此慶曆八年六月書墓誌紀其卒於是年十二月是殆絕筆固當益工也滄浪有大志而阨於奸佞擯斥以死其豪

邁抑鬱之氣往往形於議論歌詩歐陽文忠公評其詩云子美氣尤雄萬竅號一噫譬如千里駒已發不可殺手以爲其書亦然然其法度則森然也王鑿識石蘇滄浪子美草書少陵謾興八絕句而遺其一後不著名姓或有謂爲山谷道人及杜祁公者南宋諸君子以書法及富吳之歲考之定爲滄浪無疑也按懷素自叙帖前六行爲公所補與此頗相類此更頽然自放而氣亦不乏山谷與公後先俱服膺素師公得法而微病疎山谷取態而微病緩公勁在筆中山谷勁在筆外以此不能無堂廡也公爲杜祁公愛塔

公歿而祁公始學素草頗有冰王之譽然謂此卷爲
祁公書尤誤也瑯邪王世貞題

石延年御府所藏正書一

西師詩

陸經御府所藏四

正書

武林謠

蒲州詩

行書

蕭相樓等詩

郊居等詩

李建中御府所藏行書四

千題詩

雪花詩

韓見素致仕等詩

畫屏等詩

王子韶御府所藏正書一

杜衍詩

王安石御府所藏行書一

集句詩筆

蔡京御府所藏七十有七

行書

御製詩井和

御製明節皇后傳

觀明節皇后像詩

奉安明節皇后詩

劉貴妃詩

劉淑妃制

宣和殿召輔臣記

瑤林殿雙竹後記

玉宇洞後記

題澄莊等詩

留題栖雲軒

萬歲山記

遊良嶽詩

題絳霄樓詩

劉賢妃制

明達墓誌文

瓊蘭殿壁山後記

澄漪殿觀蓮記

延福宮題名記

回溪泛舟題名

萬年橋題名記

遊良嶽祝壽詩

良嶽囃囃亭題記

蕭間館題名

拈芳園記

定鼎記額

繁杏水禽詩

觀碑記

再降甘露記

對屬

德降題名

大清樂

柳真人步虛詞

大仙留題詩

芳華館買花詩

梅竹雪雁詩

閱駮射序上下二

題甘露降詩

錫宴書題二

題神霄宮詩

步虛詩詞

王扶步虛詞

蓬萊仙步虛詞

大仙詩曲

宮春宮詩

魏將軍歌

元豐歌

驄馬行二

丹青引三

送西京提刑詩二

洗兵馬詩三

謝賜成平殿曲宴記表

宣和殿東閣屏山後記

雪詩

飲中八仙歌二

元豐行

古柏行二

送孔巢父詩二

曹霸回馬詩二

春壺堂觀御題賞花詩

千文

釋法暉御府所藏正書一

細書經塔

道士陳景元御府所藏八

正書

陶隱居傳

樂毅傳

陳謀等墓誌

行書

巖棲賦

高士傳

相鶴經

種玉故事

試墨書等詩

山人蒲云御府所藏正書一

雙鈎道經

雙鈎德經

劉正夫御府所藏行書二

宣石記

泛舟題名

岑宣旦御府所藏行書四

太上道德經

曉賦

書評

崔白江湖等詩

蘇黃米蔡趙十帖

余得蔡忠惠安樂扶護二帖蘇文忠久上人一帖黃文節眉州畢大字二帖於柘湖何良俊氏又得米海

岳古詩帖於長洲張鳳翼氏提舉帖於華亭張某氏又得文忠文潛帖於長洲莫良質翁帖於崑山黃熊最後得文忠送梅花帖趙文敏騎從帖於嘉禾盛氏弭節帖於吾州周應元氏後先以善價得之不敢作米顛據舫狡僧也千狐萃腋知爲表者苦心子孫其善藏之勿落俗眼庚午初夏王世貞謹題

右昔蔡京嘗詆君謨子瞻魯直元章之書以自標異其人雖不足據要亦不爲無見至若蔡之醉凝蘇之舒雅黃之險勁米之超逸竝有師傳冠絕當世以專一家之能豈可槩詆之邪子昂旁搜遠紹可稱具體

而筋骨微劣勢不能竒然於四公殆可緩轡而方駕也王元美所購此十帖合爲一軸以爲有千狐萃腋之艱而余驟得徧閱良非易矣遂綴名字末簡并以復之夏五月俞允文記

范仲淹墨蹟

伯夷頌

士之特立獨行適於義而已不顧人之是非皆豪傑之士信道篤而自知名者也云云皇祐三年十一月戊申高平范仲淹書

此書皆謗毀艱難者讀之益以自信故退之希文尤

慙懃耳治平二年五月六日襄題

河東薛嗣昌亢宗觀

丹楊邵亢獲觀熙寧庚戌二月庚寅記

時頌榮陽舟次泗上

壬辰歲孟月月使車按部獲一觀焉執中題

范希文好談古賢人節義老而彌篤書此頌時年六十有三矣癸巳歲夏四月昌朝書

許昌題後及今二紀乃熙寧甲寅之歲仲冬澣之目念往懷賢不覺恨恨伊川逸老再題

皇祐三年侍行于青社時先公書此頌以寄京西轉運使蘇公令再見手澤不勝悲慕元祐三年六月七

日嗣子守尚書右僕射兼中書侍郎純仁謹題

崇寧五年純粹得見先公先兄遺墨千穎昌伏讀久之涕落紙上七月八日謹題

右范文正公小楷韓文公伯夷頌真蹟稀世之珍也公勲烈人品先儒已有定論徵明晚學小生不容稱述公在當時不以書名家惟山谷稱其痛快沈著近晉宋人書又言蘇才翁筆法妙天下不肯一世人獨稱文正書與樂毅論法同此頌爲才翁書真得晉人帖意非漫言也公以皇祐四年五月甲子卒此書作於三年十一月戊申相去僅二百日按公皇祐初以

疾請外守鄧以迺鎮青社不踰年歸卒於徐書此時蓋已病矣而纖麗端楷如此足以占其平時之不苟也此卷在蘇氏不知何緣流落他姓泰檜賈似道皆有印記是亦嘗藏于二家勝國時爲燕人李戡者所得戡以兩淮運使來守平江以付范氏子孫使藏之蓋大德二年戊戌也於是去皇祐二百四十八年矣自大德抵今又二百五十餘年范祠主奉傳掌不失蓋范氏之天球河圖也今主奉以益出示徵明拜觀之餘疏其本末如此以益字謙甫於文正爲十六世孫云嘉靖二十三年甲寅七月朔鄉後學文徵明拜

手書

皇祐三年十有一月文正范公在青社用黃素小楷書韓子伯夷頌遣京西轉運使蘇公舜元蓋天下萬世大綱常大議論扶植天地不可以一日無者昔文王三分天下有其二以服事殷伯夷固知其將終身西伯故辟紂而歸之其心豈遂忘殷哉一旦武王之師載木主而以王號於其衆非文王意也兄弟奮然以身爲天下萬世爭綱常繼之以死其事誠卓絕然人乃或非之至孔子時猶有以爲怨者而孔子獨曰求仁而得仁又何怨至唐時猶有以爲偏而不通者

而韓子獨曰伯夷者特立獨行窮天地亘萬世而不顧韓子之言上繼孔子而公平天下萬世有功於綱常甚大時無韓子議論廢則綱常泯吾爲此懼而幸獲睹范公之所書義士仁人壯顏毅色凜在心目間使頑者懦者一見且此汗破膽知畏議論是范公亦與有功於綱常也公平生自許忠義前後緣論諫得罪至被以誣謗自以朋黨擯斥遠外而公信道之篤躡而愈奮老而愈厲伯夷頌固其中素所蓄積者嗚呼皇祐盛明時公之書此猶義形于色設不幸戾綱常之變當何如若公者真可畏而仰哉太興李侯戲

丁丑歲得此本於燕揭來守姑蘇偕濟南陳君祥汴
梁焦君德明首謁公祠下訪問其子孫而以畀之尊
賢尚義有如此公之孫邦瑞士貴敬受而藏不啻珙
璧始其家嘗以摹本刻于義莊歲寒堂至是乃得真
跡於二百四十八年之後若有神物護持以待其子
孫而後付殆匪偶然二君議勒石傳不朽輒具論顛
未俾以刻晏元獻杜正獻文忠烈富文忠蔡忠惠諸
賢與公忠義相期各有題賦而蘇公詞翰氣槩又公
所重併刻于後若昌朝執中輩雖素有牴牾亦不以
人廢焉抑予觀忠宣公兄弟有感手澤言浪意外志

念深矣尤後人所當取節二君皆有典刑文學能亢
其宗族黨所共推尚帥其族之人與其子弟謹守此
寶圖繼前志用衍忠義之傳其永永無斁大德四年
二月初吉陵陽牟獻識

道服贊

并序

平海書記許兄製道服所以清其意而潔其身也同
年范仲淹請爲贊云

希道比部借示文正詞筆觀之若侍其人之左右令
人旣喜而且凜然也熙寧壬子孟夏丙寅陵陽守君
平雲閣題石室文同與可

魏文正公祥符八年進士也其爲同年許比部作道服贊辭莊義舒懿乎有德之言哉南北分合餘二百年而幅員疆理復混爲一區公之孫曾嗣守先業不懈益恭得公書遺蘇才翁韓文公伯夷頌真跡而寶蓄之且摹刻于石今年至正元年益都宗人復自北攜此贊併公侍祠像來南而歸之合浦之珠曲阜之履得於旣失所以委重宗祊藩飾世緒者夫豈偶然之故有相之矣熙寧間文公與可題識云希道比部而不著其名宋登科記當自可考也卷中有東漢太尉祭酒家學印高陽及仙系小印皆緣許氏則是贊

之爲許氏物蓋已久矣不知何時而遂失之也耶作贊時許公爲平海掌書記耳熙寧始轉至比部其恬於進取如此於以見許公亦盛德之士不然公豈肯輕以清其意潔其身者而許之哉昔公書伯夷頌以遺才翁今復見公爲希道撰書此贊則希道亦才翁一等人哉宋三百年文運休明泰治熙洽自景德祥符而始盛觀公此贊則公與許公之聯芳科甲信人才與時升降者爲不誣矣元年冬十有一月二十七

日東陽柳貫書

范文正公當時文武第一人至今文經武略衣被諸

儒譬如著龜而吉凶成敗不可變更也故片紙隻字
士大夫家藏之世以爲寶至其小楷筆精而瘦勁自
得古法未易言也黃庭堅書

仲淹啓熱中得回問知漢東尤甚然西洛上京皆苦
熱宜門開并救 此可知矣三兩日來因雨微涼
彼亦然矣折支已差人許州般取到即走報不易易
請見者猶煎熬不足蓋日給外月月有橫費處家家
如之邠酒四瓶近寄來請收檢鄧醞已竭候新者送
去合得花虵散空心可日一服甚有功恐疑之和方
寄上希多愛多愛不宣仲淹上師魯舍人左右七月

十四日

新牧舊誠候到即有書去兼是某侶也先託仲意
仲淹頓李寺丞行曾 遍中亦領來教承動止

休勝仲淹此中無 惟兒子病未得痊愈亦漸退

減田元君書來專送上近得 州書甚問師魯亦

已報他貧且安也暑中且得未動亦佳惟君子爲能
樂道正在此日矣加愛加愛不宣仲淹上師魯舍人
左右四月廿七日

方范文正因與呂文靖爭論土前東饒州時尹舍人
實上書願得俱貶監鄂州酒稅此一卷帖情義諄諄

不啻兄弟蓋二公愛君憂國道合志同其相與之厚
自應爾耳淳熙乙巳清明日梁谿九袞敬觀

范公二帖皆是師嘗讀漢東時書後一帖却當在前
或道自均過鄧託范公以死時問訊之書與衆云云
之戒可見也賢者困厄至此人到于今傷之藏之深
周之審石可朽名不可滅歐公名文盡之矣洪邁書
右第二紙當是尹自均來訪范於南陽時也范戒尹
以不須與衆云云此意最深淳熙戊申三月廿八日
廬陵楊萬里敬書

景祐二年公上論還都事與呂文靖異議黜知饒州

祕書丞集賢校理余靖言加罪言者非太平之政坐
落職監筠州酒稅而太子中允館閣校勘尹洙又言
范某義兼師友乞從降黜亦坐貶崇信軍節度掌書
記監郢州酒稅此二帖皆尹公在郢時所遺問若曰
目給外月月有橫費家家如之至於收檢郟酒候送
鄧醞合花蛇散和方送上見朋友有救卹通財之義
而惟君子樂道爲能盡之也其後公鎮鄧尹公再貶
監均州酒稅昇疾來鄧以存歿託公則公之於尹公
可謂生死不易其諒矣然楊洪二公跋語以第三帖
是自均來南陽時且有不須與衆云云之戒今帖中

乃無此語然以動止休佳及報他貧且安也等言証之則非疾時矣恐此跋非此帖也前帖銜縫有王厚之順伯陰文十六字印知爲順伯所藏順伯臨川王和父之孫好古博物爲中興第一徽文公與之友善集中載其書問可考也田元均諱况蓋謚宣其簡云東陽後學柳貫謹識

尹公自謂與范公義兼師友而其言談率及於性命至尹公處死生之變尤人所難及非知道者不足以與於此蓋是時風俗醇厚士大夫多不言而躬行未至立名字以相高此宋三百年極盛之際也伏觀范

公遺帖安得不爲之撫卷而三歎乎至正七年春正月甲子後學黃潛敬觀

范公與尹舍人往還書一卷嘗有與衆云云帖而逸之觀洪楊二公跋語可知也後人不見此帖乃改跋中三字作二字耳覽者當能辨之

范忠宣

門下朕惟朝廷之盛衰常以輔相爲輕重若根本彊固則精神折衝故爲呂臣奉已而不在民則晉文無復憂色汲長孺直諫而守死節則淮南爲之寢謀朕思得其人付之以政使天下聞風而心服則人主無

爲而日尊咨爾在廷咸聽朕命中大夫同知樞密院
上柱國高平縣開國伯食邑九百戶食實封貳百戶
賜紫金魚袋范純仁器遠任重才問人明進如孟子
之敬王退若蕭生之憂國朕覽觀仁祖之遺跡永懷
慶曆之元臣強諫不忘喜減孫之有後戎公是似命
召虎以來宜雖兵政之與聞疑遠猷之未究坐論西
省進貳文昌增秩益封兼隆典數於戲時難得而易
失民難安而易危予欲守在四夷以汝爲偃兵之姚
宋予欲藏千百姓以汝爲息民之蕭曹勉忠古人以
稱朕意可特授太中大夫守尚書右僕射兼中書侍

郎進封高平郡開國侯加食邑七百戶食實封二百
戶餘如故主者施行

五日

侍

中

闕

尚書左僕射兼門下侍郎臣 大防
給 事 中 臣 臨等言

制書如右請奉

制付外施行謹言

元祐三年四月五日

制可

四月六日辰時權都事蘇安靜受

左司郎中黃廉付吏部

尚書令闕

尚書左僕射 大防 未謝

尚書右僕射 純仁 未謝

尚書左丞 摯

尚書右丞 存

尚書部尚書 頌 式假

吏部侍郎 覺

告太中大夫守尚書右僕射兼中書侍郎上柱國

高平郡開國侯食邑一千六百戶食實封五百戶

范純仁奉被制書如右符到奉行

主事 丁玠

郎中次雲令 史魏宗式

書令 史闕

元祐三年四月六日下

忠宣之詰蘇文定之詞筆文正家之世寶希夷獲佐
文昌公干義曹遂得再拜敬觀竊謂與政慶曆而不
登台司兩相元祐而僅逾再稔斯措紳所共惜德厚
流光又將有所持已詩人美召虎之辭曰自召祖命

又曰作召公考希夷庶幾見之輒識卷末嘉定丙子
上巳眉山任希夷書
在宋父子顯于朝者稱韓呂二家然豈若范氏之盛
哉此詰乃忠宣公拜僕射時所受其詞筆又出眉山
蘇氏足以達爰立之意圓吉主奉出示敬書其後吳
寬

古今法書苑卷之四十一

古今法書苑卷之四十二

吳郡王世貞元美甫編

十一之墨蹟

蘇子瞻墨蹟

書陶淵明清晨間叩門詩

淵明種豆南山下詩

淵明乞食詩

淵明飲酒詩

後有三跋

樂天一山門作兩山門詩

玉川月蝕詩

淵明東方有一士詩

淵明酬劉柴桑詩

柳子厚南澗詩

李嶠汾陰行詩

董威輦詩

杜子美夔州處女髮半華詩

王梵志詩

柳柳州酬婁秀才詩

柳州飲酒讀書二首

章譽詩

評杜默詩

翟遵度詩

和王鞏六詩

葛道純詩

遵師詩

張芸叟詩

鬼仙 白鶴觀

關右壁間

西邱詩各帖

蘇子美金魚詩

彭城觀月詩

南康八境詩

潤州道上詩

綠筠亭詩

秧馬歌 有四跋

記劉景文詩

墨秀詩

記臨江驛 訟流館詩

羅浮五色雀詩

秦少游輓詞

聖俞贈歐陽閑詩

天蓬咒

韓退之送李愿序

三國名臣贊

書郭文語

車道開傳

嵇叔夜養生論 俱贈羅浮道士鄧守安

陶淡傳 徐則事 鮑靚傳

蘇李詩 雞鳴歌

記陽關第四聲 孟東野

温庭筠湖陰曲

太白廣武戰場詩

老杜雲安詩 驄馬行 黃四娘詩

李王詞

柳子厚詩

樂山香山寺詩

書韓李詩

元祐六年八月十五日與柳展如飲酒一盃便醉作
字數紙書李太白詩云遺我鳥跡書飄然落嵩間
其字乃上古讀之了不閑戲謂柳生李白尚氣乃
自招不識字可一大笑不如韓愈倔強云我寧屈
曲自世間安能隨汝巢神山也

書盧仝詩

盧仝詩云何時得去禁酒國吾今謫嶺南萬戶酒家
有一婢昔嘗爲酒肆頗能伺候冷暖自今當不乏
酒可以日飲無何其去禁酒國矣

對韓柳詩

韓退之詩云水作青羅帶山爲碧玉簪柳子厚詩云
海上羣山若劍錯秋來處處割愁腸陸道士云二
公當時不相計會好做成一屬對東坡爲之對云
繫悶豈無羅帶水割愁還有劍鏃山此可編入詩
話也

書韋蘇州詩

世傳王子敬帖有黃柑三百顆之語此帖乃在劉景文處景文歿不知今在誰矣韋蘇州有詩云書後欲題三百顆洞庭須待滿林霜蓋蘇州亦見此帖也余亦嘗有詩與景文云君家子敬十六字氣壓鄴侯三萬籥

書司空圖詩

司空圖表聖自論其詩以爲得味於味外綠樹連村暗黃花入麥稀此句最善又云碁聲花院靜幡影石壇高吾嘗游五老峯入白鶴院松陰滿庭不見

一人惟聞碁聲然後知此句之工也但恨其寒儉有僧態若杜子美云暗飛螢自照水宿鳥相呼四更山吐月殘夜水明樓則才力富健去表聖之流遠矣

書鄭谷詩

鄭谷詩云江上晚來堪畫處漁人披得一簑歸此村學中詩也柳子厚云千山鳥飛絕萬徑人蹤滅扁舟蓑笠翁獨釣寒江雪豈人性有隔哉殆天所賦不可及也已

自記吳興詩

僕爲吳興有游飛英寺詩云微雨止還作小窓幽更
妍盆山不見日草木自蒼然非至吳越不見此景
也

題楊朴妻詩

真宗東封還訪天下隱者得杞人楊朴能爲詩召對
自言不能上問臨行有人作詩送否朴言無有惟
臣妻一絕云旦休落託貧盃酒更莫猖狂愛詠詩
今日捉將官裏去這回斷送老頭皮上大笑放還
山命其子一官就養予在湖州生作詩追赴詔獄
妻子送予出門皆哭無以語之顧老妻曰子獨不

能如楊處士妻作一詩送我乎妻不覺失笑予乃
出

題子明詩後

并魯直跋

吾兄子明舊能飲酒至二十蕉葉乃稍醉與之同游
者省之墓願山觀佚老道士歌謳而飲方是時其
豪氣逸韻豈知天地之大秋毫之小耶不見十五
年乃以刑名政事著聞于蜀非復昔日之子明也
姪安節自蜀來云子明飲酒不過三蕉葉吾少年
望見酒盃而醉今亦能三蕉葉矣然舊學消亡夙
心掃地枵然爲世之廢物矣乃知二者有得必有

喪未有兩獲者也

老道士蓋子瞻之從叔蘇慎言也今年有孫汝楫登進士第東坡自云飲三蕉葉亦是醉中語予往與東坡飲一人家不能一大觥醉眠矣黃魯直題

記夢中裙帶詞

軾自蜀應舉京師道過華清宮夢明皇令賦太真妃裙帶詞覺而記之今書贈柯山潘大臨邠老云百疊漪漪水皺六銖縱縱雲輕植立含風廣殿微聞環珮搖聲元豐五年十月七日書

書清泉寺詞

黃州東南三十里爲沙湖亦曰螺師店予將買田其間因往相田得疾聞麻橋人龐安時善醫而聾安時雖聾而穎悟過人以指畫字不盡數字輒了人深意予戲之云予以手爲口君以眼爲耳皆一時異人也疾愈與之同游清泉寺在蘄水郭門外二里許有王逸少洗筆泉水極甘下臨蘭溪水西流予作歌云山下蘭芽短浸溪松間沙路淨無泥蕭蕭暮雨子規啼誰道人生難再少君看流水尚能西休將白髮唱黃雞是日極飲而歸

自記廬山詩

僕初入廬山山谷奇秀平日所未見殆應接不暇遂發意不欲作詩已而見山中僧俗皆云蘇子瞻來矣不覺作一絕云芒鞋青竹杖自掛百錢遊可怪深山裏人人識故侯既而哂前言之謬復作兩絕句云青山若無素偃蹇不相迎要識廬山面他年是故人又云自昔懷清賞神游杳靄間如今不是夢真箇在廬山是日有以陳令舉廬山記見寄者且行且讀見其中云徐凝李白之詩不覺失笑開元寺主求詩爲作一絕云帝遺銀河一派垂古來

唯有謫仙詞飛流濺沫知多少不與徐凝洗惡詩往來山南北十餘日以爲勝絕不可勝談擇其尤者莫如漱玉亭三峽橋故作二詩最後與總老同遊西林又作一絕云橫看成嶺側成峯到處看山了不同不識廬山真面目只緣身在此山中僕廬山之詩盡于此矣

書黃泥坂詞後

予在黃州大醉中作此詞小兒輩藏去蒙醒後不復見也前夜與黃庭堅曾直張耒文潛晁補之无谷夜坐二客翻倒几案搜索篋笥偶得之字半不可

讀以意尋究乃得其全文潛喜甚手錄一本以遺
予持元本去明日得王晉卿書云吾日夕購子書
不厭近又以三縑博兩紙子有近書當稍以遺我
毋多費我絹也乃用澄心堂紙李承晏墨書此遺
之元祐元年十一月二十一日

題懋寂圖詩

并曾直跋

元祐二年正月十二日蘇子瞻李伯時爲柳仲遠作
松石圖仲遠取杜子美詩松根胡僧懋寂寞龐眉
皓首無住着偏袒右肩露雙腳葉裏松子僧前落
之句復求伯時畫此數句爲懋寂圖子由題云東

坡自作蒼蒼石留取長松待伯時只有兩人嫌未
足兼收前世杜陵詩因次其韻云東坡雖是湖州
派竹石風流各一時前世畫師令姓李不妨題作
輞川詩文與可嘗云老夫墨竹一派近在徐州吾
竹雖不及石似過之此一卷公案不可不令曾直
下一句

或言子瞻不常目伯時爲前身畫師流俗人不
領便是詩病伯時一丘一壑不減古人誰當作
此癡計子瞻此語是真相知曾直書

書試院中詩

元祐三年二月二十一日領貢舉事辟李伯時爲考
校官三月初考校既畢待諸廳叅會故數往詣伯
時伯時若水悻悻不欲食作欲碾馬以排悶黃
魯直詩先成遂得之魯直詩云儀鸞供帳饗蟲行
翰林濕薪爆竹聲風簾官燭淚從橫木穿石盤未
渠透坐窓不傲令人瘦貧馬百齧逢一豆眼明見
此玉花驄徑思着鞭隨詩翁城西野奔尋小紅子
瞻次韻云少年鞍馬勤遠行夜聞鬻草風雨聲見
此忽思短策橫千里故紙鑽未透那更陪君作詩
瘦不如芋魁歸飯豆門前欲嘶御史驄詔恩三日

休老翁羨君懷中雙橘紅蔡天啓晁无咎舒堯文
廖明略皆繼此不能盡錄予又戲作絕句竹頭搶
地風不舉文書堆案睡自語看馬欲碾頓風塵亦
思歸家洗袍袴伯時笑曰有項塵馬欲入筆疾取
紙來寫之後三月六日所作皆是也眉山蘇軾書

書山局詩

急景歸來早濃陰晚不開傾盃不能飲待得卯君來
今日局中早出陰晦欲雪而子由在戶部晚出作
此數句忽記十年前在彭城時王定國來相過留
十餘日還南都時子由爲宋幕定國臨去求家書

僕醉不能作獨以一絕與之云王郎西去路漫漫
野店無人霜月寒淚濕粉箋書不得憑君送與卯
君看卯君子由小名也今日情味雖差勝彭城然
不若同歸林下夜雨對床乃爲樂耳元祐三年十
月二十三日

評詩人寫物

詩人有寫物之功桑之未落其葉沃若他木殆不可
以當此林逋梅花詩云疎影橫斜水清淺暗香浮
動月黃昏決非桃李詩皮日休白蓮花詩云無情
有根何人見月曉風清欲墮時決非紅蓮詩此乃

寫物之功若石曼卿紅梅詩云認飛無緣葉辨杏
有青枝此至陋語蓋村學中體也元祐三年十二
月六日書付過

書參寥詩

僕在黃州參寥自吳中來訪館之東坡一日夢見參
寥所作詩覺而記其兩句云寒食清明都過了石
泉槐火一時新後七年僕出守錢塘而參寥始卜
居西湖智果院院有泉出石縫間甘冷宜茶寒食
之明日僕與客泛湖自孤山來謁參寥汲泉鑽火
烹黃蘗茶忽悟所夢詩兆于七年之前衆客有驚

歎知傳記所載非虛語也元祐五年二月二十七日書

記鬼詩

秦太虛言寶應民有以嫁娶會客者酒半客一人徑起出門主人追之客若醉甚將赴水者主人急持之客曰婦人以詩招我其詞云長橋直下有蘭舟破月衝烟任意游金玉滿堂何所用爭如年少去來休倉皇就之不知其爲水也然客亦無他夜會說鬼參寥舉此聊爲記之

記謝中舍詩

寇元弼言去歲徐州倅李陶有子年十七八素不甚作詩忽詠落梅詩云流水難窮目斜陽易斷腸誰同研光帽一曲舞山香父驚問之若有物憑附者自云是謝中舍問研光帽事云西王母宴羣臣有舞者戴研光帽帽上簪花舞山香一曲未終花皆落去

書所和回先生詩

回先生詩云西鄉已富憂不足東老雖貧樂有餘白酒釀來因好客黃金散盡爲收書東坡居士和云世俗何知貧是病神仙可學道之餘但知白酒留

佳客不問黃公覓素書熙寧元年八月十九日有
道人過沈東老飲酒用石榴皮寫句壁上自稱回
山人東老送之出門至石橋上先渡橋數十步不
知其所往或曰此呂先生洞賓也七年僕過晉陵
見東老之子偕道其事時東老既沒三年矣爲和
此詩其後十六年復與偕相遇錢塘更爲書之偕
字君與有文行世其家云元祐五年五月二十五
日東坡先生書

記黃州對月詩

僕在徐州王子立子敏皆館於官舍而蜀人張師厚

來過二王方年少吹洞簫飲酒杏花下明年予謫
居黃州對月獨飲嘗有詩云去年花落徐州對
月酣歌美清夜今年黃州見花發小院閉門風露
下蓋憶與二王飲時也張師厚久已死今年子立
復爲古人哀哉

書黃州詩記劉原父語

昔爲鳳翔幕官過長安見劉原父留吾劇飲數日酒
酣謂吾曰昔陳季弼告陳元龍曰聞遠近之論謂
明府驕而自矜元龍曰夫閨門雍穆有德有行吾
敬陳元方兄弟淵清玉潔有禮有法吾敬華子魚

清修疾惡有識有義吾敬趙元達博聞強記奇逸
卓犖吾敬孔文舉雄姿傑出有霸王之略吾敬劉
元德所敬如此何驕之有餘子瑣瑣亦安足錄哉
因仰天大息此亦原父之雅趣也吾後在黃州作
詩云平生我亦輕餘子晚歲人誰念此翁蓋記原
父語也原父已沒久矣尚有貢父在每與語強人
意今復死矣何時復見此俊傑人乎悲夫

書潁州禱雨詩

元祐六年十月潁州久旱聞潁上有張龍公神祠極
靈異乃齋戒遣男迨與州學教授陳履常往禱之

迨亦頗信道教沐浴齋居而往明日當以龍骨至
天色少變二十六日景貺履常二歐陽作詩云後
夜龍作雲天明雪填渠夢回聞剝啄誰呼趙陳子
景貺拊掌曰句法甚新前此未有此法季默曰有
之長官請客吏請客曰曰主簿少府我卽此語也
相與笑語至三更歸時星斗粲然就枕未幾而雨
已鳴簷矣至朔旦日昨五人者復會于郡齋旣感
歎龍公之威德復嘉詩語之不謬季默欲書之以
爲異日一笑是日景貺出迨詩云吾儕歸臥髀骨
裂會友携壺勞行役僕笑曰是男也好勇過我

題梅聖俞詩後

驛使前時走馬回北人初識越人梅清香莫把醪醅
比祇欠溪頭月下盃梅二文長身秀眉大耳紅頰
飲酒過百盞輒正坐高拱此其醉也吾雖後輩猶
及與之周旋覽其親書詩如見其抵掌談笑也元
祐七年七月二十二日

書石芝詩後

中山教授馬君文登人也蓋嘗得石芝食之故作此
詩同賦一篇目昏不能多書令小兒執筆獨題此
數字

書蜀僧詩

王中令旣卒蜀捕逐餘寇與部隊相遠饑甚入一村
寺中主僧醉甚箕踞公怒欲斬之僧應對不懼公
竒而赦之問求蔬食僧對曰有肉無蔬公益竒之
餽以蒸猪頭食之甚美公喜問僧止能飲酒食肉
邪爲有他技也僧自言能爲詩公命賦蒸豚操筆
立成云鬣長毛短淺含臆久向山中食藥苗蒸處
已將蕉葉裹熟時兼用杏漿澆紅鮮雅稱金盤釘
軟熟真堪玉筋挑若把氈根來比竝氈根自合喫
藤條公大喜與紫衣師號元祐九年二月十三日

偶與公之玄孫訥道此因記之

書陸道士詩

江南人好作盤游飯鮓脯膾炙無不有然皆望之飯
中故里諺云擬得窖子羅浮潁老取丸飲食雜烹
之名谷董羹坐客皆稱善詩人陸道士送出一聯
句云投醪谷董羹鍋裏擬窖盤游飯碗中東坡大
喜乃爲錄之以付江秀才收爲異時一笑吳子野
云此羹可以澆佛瞿夫子無言但噉唾而已丙子
十二月八日

記虜使誦詩

昔予與北使劉霄會飲霄誦僕詩云痛飲從今有幾
日西軒月色夜來新公豈不飲者耶虜亦喜我詩
可恠也

書邁詩

兒子邁幼時嘗作林擒詩云熟顆無風時自脫半腮
迎日闌先紅于等輩中亦號有思致者今已老無
他技但亦時出新句也嘗作酸棗尉有詩云葉隨
流水歸何處牛帶寒鴉過別村亦可喜也

書過送曇秀詩後

三年避地少經過十日論詩喜啄磨自欲灰心老南

岳猶能蠶足慰東坡來時野寺無魚檣去後閑門
有雀羅從此期師真似月斷雲時復掛星河僕在
廣陵作詩送曇秀云老芝如雲月炯炯時一出今
曇秀復來惠州見予予病已絕不作詩兒子過粗
能搜句時有可觀此篇殆咄咄逼老人矣特爲書
之以滿行橐丁丑正月二十一日

錄詩寄范父

丁丑二月十四日白鶴峰新居成自嘉祐寺遷入詠
淵明時運詩曰斯晨斯夕言息其廬似爲予發也
長子邁與予別三年携諸孫萬里遠至老朽憂患

之餘不能無欣然乃次其韻我卜我居居匪一朝
龜不吾欺食此江郊廢井已塞喬木千霄我伊
何誰其裔苗下有澄潭可漱可濯江山千里供我
遐矚木固無脛尾豈有足陶匠自至笑歌相樂我
視此邦如洙如沂邦人勸我老矣安歸自我幽獨
倚門或麾豈無親友雲散莫追旦朝丁丁誰款我
廬子孫遠至笑語紛如翦髮垂髻覆此瓠壺二年
一夢乃復見予予在都下每謁范純夫諸子環繞
投紙筆求作字每調之曰訴早平訴滂乎今皆在
萬里外欲復見此豈可得哉有來請純夫書因錄

此數紙寄之丁丑閏二月五日多難畏人此詩慎
勿示人也

書蘇養直詩

屬玉雙飛水滿塘菰蒲深處浴鴛鴦白蘋蒲棹歸來
晚秋著蘆花一岸霜扁舟繫岸依林撼蕭蕭兩鬢
吹華髮萬事不理醉復醒長占烟波弄明月此篇
若置在太白集中誰復疑其非也乃吾宗養直所
作清江曲云建中靖國元年三月一日

書秦少游詞後

少游昔在虔州嘗夢中作詞云山路雨添花花動一

山春色行到小溪深處有黃鸝千百飛雲當面化
龍蛇天矯搏空碧醉臥古藤陰下了不知南北供
奉官儂君沔居湖南喜從遷客游尤爲呂元鈞所
稱又能誦少游事甚詳爲予道此詞至流涕乃錄
本使藏之建中靖國元年三月二十一日

書付龔行信

辯禪師與予善常欲通書而南華靜人皆爭請行或
問其故曰欲一見東坡翁求數字終身藏之予聞
而笑曰此子輕千里求數字其賢於叢山姥遠矣
固知辯公強將下無復老婆態也紹聖二年六月

十二日付龔行信

書歸去來詞贈契順

予謫居惠州子由在高安各以一子自隨餘分寓許昌宜興嶺海隔絕諸子不聞予耗憂愁無聊蘇州定慧院學佛者卓契順謂邁曰子何憂之甚惠州不在天上行卽到耳當爲子持書問之紹聖二年三月二日契順涉江度嶺徒行露宿僵仆瘴霧薰面重足以至惠州得書徑還予問其所求荅曰契順惟無所求而後來惠州若有求當走都下矣苦問不已乃曰昔蔡明遠鄱陽一校耳顏魯公絕糧

江淮之間明遠載米以周之魯公憐其意遺以尺書天下至今知有明遠也今契順雖無米與公然區區萬里之勤儻可以援明遠例得數字乎余欣然許之獨愧名節之重字畫之好不逮魯公故爲書淵明歸去來詞以遺之庶幾契順託此文以不朽也

跋所贈曇秀書

曇秀來惠州見東坡將去坡曰山中人見公還必求土物何以與之秀曰鷺城清風鶴嶺明月人人送與只恐他無着處坡曰不如將幾紙字去每人與

一紙但向道此是言瀟華墨裹頭有災福

題所書寶月塔銘

予撰寶月塔銘使澄心堂紙鼠鬚筆李庭珪墨皆一代之選也舟師不遠萬里來求予銘予亦不孤其意紹聖三年正月十二日東坡老人書

跋所書圓通偈

軼遷嶺海七年每遇私忌齋僧供佛多不能如舊今者北歸舟行豫章彭蠡之間遇先妣成國太夫人程氏忌日復以阻風滯留齋薦九不嚴具敬寫楞嚴經中文殊師利法王所說圓通偈一篇少伸追

往之懷行當過廬山以施山中有道者建中靖國元年四月八日書

書淵明歸去來序

俗傳書生入官庫見錢不識或恠而問之生日固知其爲錢但恠其不在紙裹中耳予偶讀淵明歸去來辭云幼稚盈室瓶無儲粟乃知俗傳信而有證使瓶有儲粟亦甚微矣此翁平生只於瓶中見粟也耶馬后宮人見大練反以爲異物晉武帝問饑民何不食肉糜細思之皆一理也聊爲好事者一笑

書淵明自祭文後

舊說淵明不知音蓄無絃琴以寄意曰但得琴中趣
何勞絃上聲劉伯倫以一鋪自隨死使埋我予以
爲伯倫非達者也棺槨衣衾不害爲達苟爲不然
死則已矣何必更埋至於淵明亦非忘琴者五音
六律不害爲忘琴苟爲不然無琴可也豈獨絃乎
以是知舊說之妄也淵明自云和以七絃豈得不
知音當是有琴而絃弊壞不復更張但撫弄以寄
意如此爲得其真其自祭文出妙語於續息之餘
豈涉死生之流乎但恨其猶以生爲寓以死爲真

嗟夫先生豈真死獨非寓乎

書阮籍語

世之所謂君子者惟法是修惟禮是克手執珪璧足
履繩墨行欲爲目前檢言欲爲無窮則少稱鄉黨
長聞鄰國上欲圖三公下不失九州牧獨不見夫
群虱之處禪中乎迺乎深縫匿乎敗絮自以爲吉
宅也行不敢離縫際動不敢出禪褶自以爲得繩
墨也然炎丘火流焦邑滅都群虱處于禪中不能
出也君子之處域內何異虱之處禪中乎此阮籍
之旨懷本趣也籍米嘗減否人物口不及世事然

禮法之士疾之如讐獨賴司馬景王保持之爾其
去死無幾以此論之亦虱之出入往來于衣巾中
間者也安能笑禪中之藏乎吾故書之以爲將來
君子一笑戊寅冬至日

書相如大人賦後

司馬相如諂事漢武開西南夷之隙及病且死猶草
封禪書此可謂死而不已者耶列仙之儒居山澤
間形容甚癯此殆得果人也而相如鄙之作大人
賦不過欲以侈言漢武帝意也夫所謂大人者相
如孺子何足以知之若賈生鵬賦真知大人者也

庚辰八月二十日書

書相如長門賦後

陳皇后廢處長門宮聞司馬相如工爲文奉百金爲
相如文君取酒相如爲作長門賦以悟主上皇后
復得幸予觀漢武雄猜恐暴而相如乃敢以微詞
褻慢及宮闈間太史公一說李陵事以爲意沮貳
師遂下蠶室陳皇后得罪止坐衛子夫子夫之愛
不減李夫人豈區區貳師所能比乎而於相如之
賦獨不疑其有間於子夫者豈非幸與不幸固自
有命歟世以禍福論工拙而以太史公不能保身

於明哲者皆非通論也

書淵明飲酒詩後

顏生稱爲仁榮公言有道屢空不獲年長饑至千老
雖留身後名一生亦枯槁死去何所知稱心固爲
好客養千金軀臨化消其寶裸葬何必惡人當解
意表此淵明飲酒詩也正飲酒中不知何緣記得
此許多事元豐五年三月三日子瞻與客飲酒客
令書此詩因題其後

書淵明羲農去我久詩

予聞江州東林寺有陶淵明詩集方欲遣人求之而

李江州忽送一部遺予字大紙
中不佳輒取讀不過一篇惟恐

題淵明詩

陶靖節云平疇交遠風良苗亦懷新非古之偶耕植
杖者不能道此語非余之世晨亦不能識此語之
妙也

又

秋菊有佳色裛露掇其英泛此無憂物遠我遺世情
一觴聊獨進盃盡壺自傾日入群動息飛鳥趨林
鳴嘯傲東窻下聊復得此生靖節以無事自適爲

得此生則凡役於物者非失此生耶

題淵明詠二疎詩

此淵明詠二疎也淵明未嘗出二疎既出而知返其志一也或以謂既出而返如從病得愈其味勝於初不病此惑者顛倒見耳

題淵明飲酒詩後

採菊東籬下悠然見南山因採菊而見山境與意會此句最有妙處近歲俗本皆作望南山則此一篇神氣都索然矣古人用意深微而俗士率然妄以意改此最可疾近見新聞韓柳集多所刊定失真

者多矣

記太白詩

人生燭上花光滅巧研盡春風遶樹頭日與化工進
惟知雨露貪不念零落近昔我飛骨時慘見當塗
墳青松靄明霞縹緲上下村既死明月魄無彼玻
瓈竟念此一脫灑長嘯登崑崙醉着鸞鳳衣星斗
俯可捫朝披雲夢澤笠釣青茫茫尋絲得雙鯉中
有三元章篆字若丹蛇逸勢如飛翔歸來問天姥
妙義不可量金刀割青素靈文爛煌煌燕服十二
鑲想見仙人房暮跨紫鱗去海氣侵肌涼龍子喜

變化化作梅花粧遺我纍纍珠靡靡明月光勸我
穿絳纒繫作裾間襜揖余以辭去談笑聞餘香余
頃在京師有道人相訪風骨甚異語論不凡自云
常與物外諸公往還口誦此二篇云東華上清監
清逸真人李太白作也

記退之拋青春句

韓退之詩曰百年未滿不得死且可勤買拋青春國
史補云酒有郢之富春烏程之若下春滎陽之土
窟春富平之石凍春劔南之燒春杜子美亦云聞
道雲安麴米春纔傾一盞便醺人近世裴劍作傳

竒記裴航事亦有酒名松醪春乃知唐人名酒多
以春則拋青春亦必酒名也

辨杜子美杜鵑詩

南都王誼伯書江濱驛垣謂子美詩歷五季兵火舛
缺離異雖經其祖父公所理尚有疑缺者誼伯謂
西川有杜鵑東川無杜鵑涪萬無杜鵑雲安有杜
鵑蓋是題下注斷自我昔游錦城爲首句誼伯誤
矣且子美詩備諸家體非必牽合程度侃侃然者
也是篇句落處凡五杜鵑豈可以文害辭辭害意
耶原子美之意類有所感託物以發者也亦六義

之比與離騷之法歟按博物志杜鵑生子寄之他巢百鳥爲飼之胡江東所謂杜宇曾爲蜀帝王化禽飛去舊城荒且禽鳥至微知有尊故子美云重是古帝魂又云禮若奉至尊子美蓋譏當時之刺史有不禽鳥若也唐自明皇已後天步多棘刺史能造次不忘於君者可一二數也嚴武在蜀雖橫歛刻薄而實資中原是西川有杜鵑其不虔王命負固以自抗擅軍旅絕貢賦如杜克遜在梓州爲朝廷西顧憂是東川無杜鵑耳至於涪萬雲安刺史微不可考凡其尊君者爲有也懷貳者爲無也

不在夫杜鵑之真有無也誼伯以爲來東川聞杜鵑聲繁而怠乃始歎子美詩跋寔紙上語又云子美不應疊用韻何耶子美自我作古疊用韻無害於爲詩僕所見如此誼伯博學強辨殆必有以折衷之

記子美人陣圖詩

僕嘗夢見一人云是杜子美謂僕世多誤會予詩八陣圖云江流石不轉遺恨失吞吳世人皆以謂先王武侯欲與關羽復讐故恨不能滅吳非也我意本謂吳蜀唇齒之國不當相圖晉之所以能取蜀

者以蜀有吞吳之意此爲恨耳此理甚近然子美死近四百年猶不忘詩區區自明其意者此真書生習氣也

書子美屏跡詩

用拙存吾道幽居近物情桑麻深雨露燕雀半生成
村鼓時時急漁舟箇箇輕杖藜從白首心蹟喜雙
清晚起家何事無營地轉幽竹光陶野色山影漾
江流失學從兒懶長貧任婦愁百年渾得醉一月
不梳頭子瞻云此東坡居士之詩也或者曰此杜
子美屏跡詩也居士安得竊之居士曰夫禾麻穀

麥起於神農后稷今家有倉廩不取而取輒爲盜
被盜者爲失主若必從其初則農稷之物也今考
其詩字字皆居士實錄是則居士詩也子美安得
禁吾有哉

記子美逸詩

聞惠子過東溪詩云惠子白驢瘦歸溪唯病身皇天
無老眼空谷滯斯人嵩密松花熟山盃竹葉春柴
門了無事黃綺未稱臣此一篇予與劉斯立得之
於管城人家葉子冊中題云杜員外詩集名甫字
子美其餘諸篇語多不同如故園楊柳今搖落安

得愁中却盡生之類也鳳翔魏起興叔云天興人
掘得此詩石刻與此少異崑密松花古村醪竹葉
春柴門了生事園綺未稱臣

評子美詩

子美自比稷與契人未必許也然其詩云舜舉十六
相身尊道益高秦時用商鞅法令如牛毛此自是
契稷輩人口中語也又云知名未足稱局促商山
芝又云王侯與螻蟻同盡隨丘墟願聞第一義回
向心地初乃知子美詩外尚有事在也

書赤壁賦後

黃州少西山麓斗入江中石色如丹傳云曹公敗處
所謂赤壁者或曰非也時曹公敗歸由華容路路
多泥濘使老弱先行踐之而過曰劉備智過人而
見事遲華容夾道皆葭葦使縱火則吾無遺類矣
今赤壁少西對岸即華容鎮廢幾是也然岳州復
有華容縣竟不知孰是今日李季秀才來相別因
以小舟載酒飲于赤壁下李善吹笛酒酣作數弄
風起水湧大魚皆出上有棲鶻亦驚起生念孟德
公瑾如昨日耳適會范子豐兄弟來求書字遂書
以寄之李字公達云元豐六年八月五日

記夢春牛文

元豐六年十一月二十七日天欲明夢數吏人持紙一幅其上題曰請祭春牛文予取筆疾書其上云三陽已進庶草將興爰出土牛以戒農事衣被青黃之好本出泥塗成毀須臾之間孰爲喜愠吏微笑曰此兩句後當有怒者傍一吏云不妨不妨此是喚醒他

跋送石昌言引

右嘉祐元年九月十九日先君送石昌言北使文一首其字則軾年二十一歲時所書與昌言本也今

蓄於陳履常氏昌言名楊休善爲詩有名當時終於知制誥彭任字有道亦蜀人從富彥國使虜還得靈河縣主簿以死石守道嘗稱之曰有道長七尺而膽過其身一日坐酒肆與其徒飲且酣聞彥國當使不測之虜憤憤推酒床奉皮裂遂自請行蓋欲以死扞彥國者也其爲人大略如此然亦任俠好殺云元祐三年九月一日題

自評文

吾文如萬斛泉源不擇地皆可出在平地滔滔汨汨雖一日千里無難及其與山石曲折隨物賦形而

不可知也所可知者常行於所當行常止於不可不止如是而已矣其他雖吾亦不能知

跋邢惇夫南征賦

邢惇夫自爲童子所與游皆諸公長者其志豈獨蘄以文稱而已哉一日不見遂與草木俱盡故曾直無咎諸人哭之皆過時而哀今觀此文亦足少慰舊嘗見江南李泰伯自述其文曰天將壽我歟所爲固未足也不然斯亦足以藉手見古人矣吾於惇夫亦云元祐四年四月十六日

書松醪賦後

予在資善堂與吳傳正爲世外之遊及將赴中山傳正贈予張遇易水供堂墨一丸而別紹聖元年閏四月十五日予赴英州過韋城而傳正之甥歐陽思仲在焉相與談傳正高風歎息久之始予嘗作洞庭春色賦傳正獨愛重之求予觀書其本近又作中山松醪賦不減前作獨恨傳正未見乃取李氏澄心堂紙杭州程奕鼠鬚筆傳正所贈易水供堂墨錄本以授思仲使面授傳正耳祝深藏之傳正平生學道既有得矣予亦竊其一二今將適嶺表恨不及一別故以此賦爲贈而致思於卒章可

以超然想望而常相從也

書六賦後

予中子迨本相從英州舟行已至姑孰而予道敗建昌司軍司馬州安置不可復以家行獨與少子過往而使迨以家歸陽羨從長子邁居迨好學知爲楚詞有世外奇志故書此六賦以贈其行紹聖元年六月二十五日東坡居士書

跋石鍾山記後

錢塘東南皆有水樂洞泉流空崑中皆自然宮商又自靈隱下天竺而上至上天竺谿行兩山間巨石

磊磊如牛羊其聲空蕩然真若鍾聲乃知莊生所謂天籟者蓋無所不在也建中靖國元年正月一日自海南還過南安司法掾吳君示舊所作石鍾山記復書其末

書管幼安傳

曹操旣得志士人靡然歸之自旬文若盛名猶爲之經營謀慮一旦小異便爲謀殺程昱郭嘉之流不足數也孔文舉奇逸博聞志大而才疎每所論建輒中操意况肯爲用然終亦不免桓溫謂孟嘉曰人不可無勢我能駕馭卿夫溫之才百倍于嘉所

以云爾者自知其陰賊險狠不爲高人勝士所比
數爾管幼安懷寶遜世就閑海表其視曹操父子
真穿窬斗筭而已終身不屈旣不得而殺予以謂
賢於文若文舉遠矣元豐三年十二月與客飲醉
甚歸坐雪堂面仆壁上睡久驚覺已三更矣殘燭
耿然偶取一冊視之則管幼安傳也會有所感不
覺書此眼花手顛不復成字

書南史盧度傳

予少不喜殺生然未能斷也近來始能不殺猪羊然
性嗜鱓蛤故不免殺自去年得罪下獄始意不免

旣而得脫遂自此不復殺一物有見餉鱓蛤者皆
放之江中雖知蛤在江水無活理然猶庶幾萬一
便便不活亦愈于煎烹也非有所求覲但以親經
患難不異雞鴨之在庖厨不忍復以口腹之故使
有生之類受無量怖苦爾猶恨未能忘味食自死
物也南史隱逸傳始興人盧度字彥章有道術少
隨張永北侵魏永敗魏人追急淮水不得過自誓
若得免死從今不復殺生須臾見兩楫流來接之
得過後隱居廬陵西昌三顧山鳥獸隨之夜有鹿
觸其壁度曰汝壞我壁鹿應聲去屋前有池養魚

皆名呼之次第取食逆知死年月竟以壽終偶讀
此書與予事粗相類故并錄之

書汴河斗門

數年前朝廷作汴河斗門以淤田議者以爲不可竟
爲之然卒亦無功方樊山水盛時於斗門則河田
墳墓間舍皆被害及秋深水退而放則淤不能厚
謂之前餅淤朝廷厭之而罷偶讀白居易甲乙判
有云得轉運使以汴河水淺不通請築塞兩河斗
開節度使以當官管田志在河次若斗門築塞無
以供軍乃知唐時汴河兩岸皆有管田斗門若運

者
水不乏既可淮古有之而今不能何也當更問知

